

四庫全書

子部

欽定四庫全書

御定星厯考原卷三

月事吉神

天道

乾坤寶典曰天道者天之元陽順理之方也其地宜興
舉衆務向之上吉○廣聖厯曰天道正月九月在南
方二月在西南方三月七月在北方四月十二月在
西方五月在西北方六月十月在東方八月在東北

方十一月在東南方也

按天道者天德所在之方也義見下節

天德

乾坤寶典曰天德者天之福德也所理之方所直之日
可以興土功營宮室○堪輿經曰天德者正月丁二
月坤三月壬四月辛五月乾六月甲七月癸八月艮
九月丙十月乙十一月巽十二月庚○曹震圭曰四
益之月以陰干為天德者是天道惠其未生也正月

丙火生而丁火未生四月庚金生而辛金未生七月
壬水生而癸水未生十月甲木生而乙木未生故以
陰干為德也四季之月以陽干為天德者是天道惠
其自墓也三月壬水墓六月甲木墓九月丙火墓十
二月庚金墓故以陽干為德也四仲之月以四維之
卦為德者是天道變化成功也二月萬物將生致役
乎坤也五月陰氣將生乾道變化也八月萬物將收
成言乎艮也十一月陰氣散陽氣入巽入也風以散

之也

按天德者三合之氣也如正五九月建寅午戌合火局故以火為德正月丁九月丙五月乾戌火墓在乾宮也二六十月建卯未亥合木局故以木為德六月甲十月乙二月坤未木墓在坤宮也三七十一月建辰申子合水局故以水為德三月壬七月癸十一月巽辰水墓在巽宮也四八月十二月建巳酉丑合金局故以金為德四月辛十二月庚八月艮丑金墓在

艮宮也寅申巳亥月乃五行長生之位故配陰干辰戌丑未乃五行墓庫之位故配陽干子午卯酉乃五行當王之位故以配墓辰本宮之卦不用支而用干者支地也干天也名曰天德故用天干又用四卦以代辰戌丑未者不用地支故也

月德

天寶曆曰月德者月之德神也取土修營宜向其方宴樂上官利用其日○曆例曰月德者正五九月在丙

二十六月在甲三十七月在壬四十八月在庚
○曹震圭曰月德者月中之陽德也故幹為尊枝為
卑是臣求君德也以三合五行陽幹為德假令寅午
戌三合為火以丙為德是各求自旺之幹為應助也
餘倣此

天德合

天寶歷曰天德合者合德之神也所理之方宜營構宮
室修築城垣所直之日宜覃恩賜赦命將出師禱禮

山川祈請福願○厯例曰天德合者正月壬三月丁
四月丙六月己七月戊九月辛十月庚十二月乙是
也四仲之月天德居四維故無合也

按天德合者即各以其月天德所合之干為之

月德合

五行論曰月德合者五行之精符會為合也所理之地
衆惡皆消所直之日百福並集利以出師命將上冊
受封祠祀星辰營建宮室○厯例曰月德合者正五

九月在辛二六十月在巳三七十一月在丁四十八
二月在乙

按月德合者即各以月德所合之干為之

月空

天寶歷曰月空者月中陰德之神所理之地宜會親姻
安產室所直之日宜設籌謀定計策陳剝利害獻封
表章○歷例曰月空者正五九月壬二六十月庚三
七十一月丙四八十二月甲○曹震圭曰月空者月

內不掌吉凶待時而動之神也蓋寅午戌月火王用
事壬水無用亦不能克火王也故謂之月空餘倣此

天恩

天寶曆曰天恩者施德寬下之辰也天有四禁常開一
門甲為陽德配巳成養育之功故甲配子巳配卯酉
各五日而為恩也南方衰謝之地無施之方故不配
之萬物非土不生故以巳土配甲成功其日可以施
恩賞布政事恤孤惻興宴樂○曆例曰常以甲子至

戊辰巳卯至癸未巳酉至癸丑凡一十五日○曹震
圭曰天有四禁子午卯酉也子為元武門午為明堂
門卯為日門酉為月門蓋聖人居明堂而治天下故
常開此門易所謂聖人南面聽天下嚮明而治者也
甲為乾之納甲巳為離之納甲先天乾居正南後天
離居正南故以甲配子巳配卯酉然則不配午者以
甲巳皆南方卦之納甲也各進五辰而不及六者謂
五為君位中央之數不可過也故各配五日合之成

一十有五為天恩上吉日

天赦

天寶歷曰天赦者赦過宥罪之辰也天之生育甲與戊地之成立子午寅申故以甲戌配成天赦其日可以緩刑獄雪冤枉施恩惠若與德神會合尤宜興造○歷例曰春戊寅夏甲午秋戊申冬甲子是也○曹震圭曰天赦者乃天之赦過宥罪之神也生萬物者土也土之所居者四季也助土而成功者甲巳也子午者

陰陽氣爭之辰是其罪也寅申者陰陽否泰之辰是其過也至此四辰天道憫其罪過故以甲巳配合而助以赦之辰戌者陽土也以甲配之春起甲戌秋起甲辰丑未者陰土也以巳配之夏起巳丑冬起巳未皆四時長生前一辰順數至當王之陽辰是也

按天赦為赦過之辰則非以子午寅申為罪過也蓋子午寅申者乃四時當王之陽辰甲戌於十干中為最尊所謂甲為諸神之首戌以助甲成功也故以配

其日皆取干不克支有上能生下之意如戊寅木非土不生也甲午木生火也戊申土生金也甲子雖非相生若戊子則以土克水故以甲配之且甲木生於亥水亦生木也故曰天赦

母倉

天寶歷曰母倉者五行當王所生者為母倉如遇土王後則以己午為之其日宜養育羣畜栽植種蒔○歷例曰春亥子夏寅卯秋辰戌丑未冬申酉土王後已

午○曹震圭曰生我者為母積藏者為倉故以名之
各以生當時五行之辰為之

按春屬木水生之故以亥子為母倉也餘倣此不用
干而用支者支為地有母道焉萬物生於土有藏道
焉

月恩

五行論曰月恩者陽建所生之干也子母相從謂之月
恩其日宜營造婚姻移徙祭祀上官納財○歷例曰

月恩者正月丙二月丁三月庚四月巳五月戌六月
辛七月壬八月癸九月庚十月乙十一月甲十二月
辛○曹震圭曰月恩者子母相從是月建反生於彼
蓋母生我我生子之義

按正月寅陽木生丙陽火二月卯陰木生丁陰火則
各從其類也餘倣此

生氣

五行論曰生氣者極福之神也其日宜修築城壘開道

溝渠起土修營養育羣畜種蒔如出軍戰陣則宜背
之○歷例曰生氣者常居月建後二辰○曹震圭曰
生氣者萬物所生之辰也生育萬物者土也土之所
居者四季也四季者乃四時五行所衰之辰也自衰
然後可生彼故以四時前季辰為生物之位假令冬
水生春木水衰於丑生木於前木之長生在亥也木
衰於辰生火於前火之長生在寅也火衰於未生金
於前金生於巳也金衰於戌生水於前水生於申也

皆各居其後二辰此其義也

按月建乃當王之氣不可以衰言也且生氣亦不耑在四維之位亦不可耑以五行之長生言也大抵月建者當正王之位而前二辰已有生氣是未旺而將旺者也如正月為三陽之月而子則一陽已生是為生氣也可與王日官日參看益明

天喜

總要歷曰天喜者慶喜之神也其日宜封建宴樂策試

賢良納采問名拜官慶賜○歷例曰春午夏丑秋辰
冬未○曹震圭曰天喜者四時天道喜愛之辰也萬
物之喜愛者無比於子母謂春木生火為子以火王
於午為天喜也夏火生土土無正位遂以火為生金
實四時代謝之理洞源經云火不克金何王是也故
以金為子金之所居者丑以丑為天喜也秋金生水
為子水之所居者辰以辰為天喜也冬水生木為子
木之所居者未以未為天喜也火不喜其所居而喜

其王者春氣發泄萬物始生未成體實而無所居故取王為喜也別陰陽家亦以所居為天喜

按通書所載春皆以戌為天喜蓋春木生火火墓於戌也餘曹氏之說得之

天倉

總要歷曰天倉者天庫之神也其日可以修倉庫受賞賜納財牧養○歷例曰天倉者正月起寅逆行十二辰○曹震圭曰倉者藏也月建私藏之神也蓋建寅

之月天地交泰陰陽各半而氣同故共藏於本建至
二月陰陽氣離則建事於前私藏於後故厯丑逆行
至七月陰陽否其氣又同陰陽各半亦同藏於申也

天馬

神樞經曰天馬者天之驛騎也其日宜拜公卿擇賢良
宣布政事遠行出征○李鼎祚曰天馬者正月起午
順行六陽辰○曹震圭曰天馬者是乾體六陽用事
之神也建戌之月剝卦直事惟餘上九一陽爻辭云

碩果不食是陽不可以盡剝故建戌之月復得本位
為乾之世爻易云乾為天為馬因以名之

按乾卦納子寅辰午申戌從初九順配之天馬則四
十月在子意者四月乾卦十月建亥又在乾宮故以
配乾之初九歟與曹氏之說相發又按午為馬故正
月起午馬健行故順歷六陽辰又天馬與白虎同見
後

驛馬

神樞經曰驛馬者驛騎也其日宜封贈官爵詔命公卿
遠行赴任移徙遷居○李鼎祚曰驛馬者正月起申
逆行四孟○曹震圭曰驛馬者五行將病得見妻子
似人值困途逢妻子者也假令寅午戌火也病於申
中有庚為妻戌為子故以申為馬申子辰水也病於
寅中有丙為妻甲為子亥卯未木也病於巳中有戊
為妻丙為子巳酉丑金也病於亥中有甲為妻壬為
子也洞源經云既病見子驛馬到來

天醫

總要歷曰天醫者天之巫醫其日宜請藥避病尋巫禱
祀○歷例曰天醫者正月起戌順行十二辰○曹震
圭曰天醫者三合後辰能使萬物死而復生損而復
益如正月建寅三合為寅午戌而戌為寅之後辰是
也餘倣此

六合

神樞經曰六合者日月合宿之辰也其日宜會賓客結

親姻立契券合交易○李鼎祚曰正月在亥逆行十
二辰

按六合者月建與月將相合也義見第一卷

三合

曾門經曰三合者異位而同氣也寅午戌火之三合巳
酉丑金之三合申子辰水之三合亥卯未木之三合
其日宜結會親姻和合交易修營起土立木上梁○
歷例曰正月在午戌二月在未亥三月在子申四月

在丑酉五月在寅戌六月在卯亥七月在子辰八月
在丑巳九月在寅午十月在卯未十一月在辰申十
二月在丑巳

按三合者各與其月建會成三合局也義見第一卷

福德

總要歷曰福德者月中福德之神也其日宜祀神祇求
福願修宮室獻封章○歷例曰福德常居月建前二
辰○曹震圭曰建前二辰者是月所生之子以其當

相氣在前為引與我能為福為德之神也故易卦以子孫爻為福德其義一也大抵子能制乎鬼使不害已故為福德假令正月寅以火生辰土為子其土能制水鬼也二月卯木生巳火為子火能制金鬼也三月辰之衰木能生午火為子去制金鬼也餘倣此按十二地支各有所藏若以前二辰為月建所生者亦無不合則生氣之在月建前二辰亦當取此義

五富

總要歷曰五富者富盛之神也其日宜興舉運動估市
經求○歷例曰正月起亥順行四益○曹震圭曰五
富者月中餘盛之神也蓋寅午戌月火王喜亥中甲
木而生申子辰月水王愛巳中庚金而生亥卯未月
木王求寅木相助巳酉丑月金王求申中庚金相益
故曰餘盛此其義也

吉期

總要歷曰吉期者吉慶之神也所直之日宜出軍行師

攻城寨與弔伐會親姻○歷例曰常居月建前一辰也○曹震圭曰吉期者是月建腹心同契之侍臣也蓋常居建前一辰可與要約吉事故因名之

要安

樞要歷曰要安者月中吉神也所直之日宜安撫邊境修葺城隍○歷例曰要安者正月寅二月申三月卯四月酉五月辰六月戌七月巳八月亥九月午十月子十一月未十二月丑也○曹震圭曰要安者要而

用之可得安也蓋陽建之月歷寅卯辰巳午未陰建之月歷申酉戌亥子丑也如是則陽辰之月用陽氣通泰之辰陰辰之月用陰氣柔和之辰類易卦之六爻剛柔相應之象

玉宇

樞要歷曰玉宇者月中貴神也所直之日宜修宮闕繕亭臺結婚姻會賓客○歷例曰正月卯二月酉三月辰四月戌五月巳六月亥七月午八月子九月未十

月丑十一月申十二月寅○曹震圭曰玉宇者月建所安之室也卯酉者日月之門分界之位東南方陽位也為外為前故陽建居之西北方陰位也為內為後故陰月居之似人之居處男居於前女居於後也

金堂

樞要歷曰金堂者月中善神也所直之日宜營建宮室興造修築○歷例曰正月辰二月戌三月巳四月亥五月午六月子七月未八月丑九月申十月寅十一

月酉十二月卯○曹震圭曰金堂者建神安樂之堂也常在玉宇之前似王公建修宅第之次序也

敬安

樞要歷曰敬安者恭順之神也所直之日宜睦親族敘尊卑納禮儀行慶賜○歷例曰敬安者正月未二月丑三月申四月寅五月酉六月卯七月戌八月辰九月亥十月巳十一月子十二月午○曹震圭曰敬安者是陰陽相會之義也陽會陰而必敬陰會陽而必

恭若恭而敬必得安也蓋未申酉戌亥陰氣用事之
辰故陽辰之月會之丑寅卯辰巳陽氣用事故陰辰
之月會之子午陰陽爭故自會也其義如此

普護

樞要歷曰普護者福廕之神也所直之日宜祭祀禱祠
尋醫避病○歷例曰普護者正月申二月寅三月酉
四月卯五月戌六月辰七月亥八月巳九月子十月
午十一月丑十二月未○曹震圭曰普護者乃月中

普護萬物無偏私之神也常與要安相對蓋申酉戌
亥子丑乃陰權否室之位與陽建之月相配寅卯辰
巳午未乃陽氣通泰之位與陰建之月相配是月內
陰陽暗有相護之神也

福生

樞要歷曰福生者月中福神也所直之日宜祈福求恩
祀神致祭○歷例曰福生者正月酉二月卯三月戌
四月辰五月亥六月巳七月子八月午九月丑十月

未十一月寅十二月申○曹震圭曰福生者月內祈求福願之神也故與玉宇相對謂玉宇為月建之所安向之則所以邀福月建顧其所向亦所以造福也

聖心

樞要歷曰聖心者月中福神也其日宜上表章行恩澤營百事○歷例曰聖心者正月亥二月巳三月子四月午五月丑六月未七月寅八月申九月卯十月酉十一月辰十二月戌○曹震圭曰勞而不敢安者聖

人之心也蓋陽辰之月順理陽卦之位陰辰之月順
治陰卦之位聖人居中治理八方陰陽各當使君子
小人無交錯也初寅之月起於乾宮亥者是順天之
道也

按正三五七九十一為陽建之月故從亥至辰配乾
坎艮震四陽卦二四六八十十二為陰建之月故從
巳至戌配巽離坤兌四陰卦

益後

樞要歷曰益後者月中福神也所直之日宜造宅舍築垣牆行嫁娶安產室○歷例曰正月子二月午三月丑四月未五月寅六月申七月卯八月酉九月辰十月戌十一月巳十二月亥○曹震圭曰益後者於子嗣有補益之神也子丑寅卯辰巳為陽氣之位以陽建之月配之午未申酉戌亥為陰氣之位則以陰建之月配之陰陽會和既生男女當夫訓其男婦教其女使男從夫道女從婦德各從其道當有益於將來

故云蓋後

續世

樞要歷曰續世者月中善神也所直之日宜結婚姻睦
親族祀神祇求嗣續○歷例曰續世者正月丑二月
未三月寅四月申五月卯六月酉七月辰八月戌九
月巳十月亥十一月午十二月子是也

按續世者月中繼續之神也常在蓋後後一辰蓋亦
與玉宇金堂之相連者同意○又按自要安至續世

凡九神其起例皆以六陰月與六陽月對衝如正月寅則二月申正月卯則二月酉是也餘倣此

天后

總要歷曰天后者月中福神也所直之日宜求醫療病祈福禮神○歷例曰天后正月起申逆行四孟○曹震圭曰天后者驛馬也是五行受病復見妻子反有救助而有食有養也似困而得馬饑而得食也假令寅午戌火以申為妻為馬及有生戌為食也故曰天

后后者主生育萬物為萬物之母故因名之

天巫

總要歷曰天巫者月中善神也所直之日宜合藥請醫
祀鬼神求福願○歷例曰常居月建前二辰○曹震
圭曰天巫者月中善神能克除鬼殺也義與福德同

天願

總要歷曰天願者月中善神也所直之日宜嫁娶納財
敦睦親族○歷例曰天願者正月甲午二月甲戌三

月乙酉四月丙子五月丁丑六月戊午七月甲寅八月丙辰九月辛卯十月戊辰十一月甲子十二月癸未○曹震圭曰天願者乃月建枝德合神也陽前陰後五辰各以陽干配之四季月以陰干配之若遇四孟及丑未子午者無合蓋謂亥巳為陰陽終極之辰寅申為陰陽否泰之辰丑未為陰陽絕蔑之辰子午為陽消陰長之辰故不可為合也十干巳為六賊庚為白虎壬為元武故不可用也若逢忌用之辰以前

後近者用之假令正月未為枝德今忌用取近未者
午以壬干甲配之得甲午也二月甲戌三月乙酉四
月丙子五月忌亥退合丑就以丁配故得丁丑六月
忌寅就午六合以戌配得戌午七月否建之辰忌丑
就寅寅中有甲從其泰也八月忌庚用丙謂金生於
巳巳中有
丙火配得丙辰九月辛卯十月忌壬以戌之陽土能
聚水潰易有比卦之義故得戌辰十一月以其自建
者謂前後皆無所配然建子之月未可假力於人其

忌壬用甲者是待其子有所助也十二月忌申以就
近申之未故得癸未其義如此

四相

總要歷曰四相者四時王相之辰也其日宜修營起工
養育生財栽植種蒔移徙遠行○歷例曰春丙丁夏
戊巳秋壬癸冬甲乙○曹震圭曰四相者養育之道
母生子也春木王生丙丁夏火王生戊巳秋金王生
壬癸冬水王生甲乙惟庚辛者金也能殺萬物故不

用

四時天德

總要歷曰四時天德者四序中德神也其日宜慶賜宴
樂拜官賞賀○歷例曰春午夏辰秋子冬寅○曹震
圭曰子寅辰午乃東方生育之陽辰故用事吉也申
戌者西方之殺氣故不可用也各以四時所生之陽
辰而為之是我生者為德也亦名時德

按時德與四相同義春木生午火夏火生辰土秋金

生子水冬水生寅木也四相取天干時德取地支

陽德

總要歷曰陽德者月中德神也所直之日宜交易開市
結親姻○歷例曰正月起戌順行六陽辰○曹震圭
曰陽德者乾陽之道也陽道不可以盡剝故正月起
戌應乾之上九戌者乾之世爻又五月一陰生即配
於午順歷乾之六爻六陽月居於寅午戌火炎上為
尊為夫也六陰月臨於申子辰水潤下為卑為婦也

故所直之日長幼有序夫婦有別是嘉會合禮之辰
故宜如此

陰德

總要歷曰陰德者月內陰德之神也所直之日宜施陰
陽行惠愛雪冤枉舉正直○歷例曰正月起酉逆行
六陰辰○曹震圭曰陰德者是月中坤陰之道也正
月起於酉應坤之上六酉者坤之世爻故從酉逆歷
坤之六爻坤者厚德載物也含弘光大萬物資生故

宜如此

解神

總要歷曰解神者月中善神也所直之日宜上詞章雪
冤枉○歷例曰正二月中三四月戌五六月子七八
月寅九十月辰十一月十二月午也○曹震圭曰解
神者月中對奏直諫之臣也常居與月建相對之陽
辰與太歲中奏書一義蓋忠直之臣不處私陰之位
也

六儀

神樞經曰六儀者月中吉神也所直之日宜牧養生財
栽植樹木結親納禮視事臨官○歷例曰正月起辰
逆行十二辰○曹震圭曰六儀者月中內正禮儀使
陰建無敢私邪之神也月厭主事暗昧不正之神故
六儀與敵衝以威厲之使不敢妄失儀容也因以名
之常與陰建對衝者是也

時陽

總要歷曰時陽者月中陽神也所直之日宜敘婚姻行
宴樂○歷例曰常居月建後二辰○曹震圭曰時陽
者月內掌陽氣之神父夫之象故陽之主事威儀正
直有禮義儀容故其日宜敘婚姻行宴樂其起例見
下節

時陰

總要歷曰時陰者月中陰神也所直之日宜運謀算畫
計策睦子孫會親友○歷例曰常居月建前四辰○

曹震圭曰時陰者月內陰氣之神母婦之象故陰神主事機密不測故其日宜運謀算畫計策會親友睦子孫起例常以月建加功曹子上所得之辰為時陽午上所得之辰為時陰謂子者一陽初生也故時陽取焉午者一陰初生也故時陰取焉寅者艮方成終成始之位三陽交泰之所故以加之太乙家常以計神加和德其義一也

兵吉 兵福 兵寶

總要歷曰兵吉兵福兵寶者皆月內用兵之吉辰也其
日宜出師命將攻伐略地○歷例曰兵吉者正月子
丑寅卯二月亥子丑寅三月戌亥子丑四月酉戌亥
子五月申酉戌亥六月未申酉戌七月午未申酉八
月巳午未申九月辰巳午未十月卯辰巳午十一月
寅卯辰巳十二月丑寅卯辰○兵福者與月建同行
○兵寶者月建前一辰也○曹震圭曰兵吉逐月漸
退一辰者是兵家無有妄進無有躁動之意故云兵

者不祥之器不得已而用之也又易卦師之六四曰
師左次無咎言左次則為退舍也故見可而進知難
而退師之常也又太白陰經曰未見而戰雖衆必潰
見利而戰雖寡必勝是兵家不可以妄舉輕進此陰
陽之戒也○兵福兵寶者乃當時王相之辰也太白
陽經曰五帝所在不可出軍向之必敗春東方夏南
方秋西方冬北方又云春不東行是謂伐生百事不
成夏不南行是謂伐強兵卒多殃秋不西行是謂伐

熟兵將不復冬不北行是謂伐藏士卒多傷故月建所在為王相之方我用而我利也

王日 官日 相日 民日 守日

壇經曰王官相民守日者皆月內視事之吉辰也所直之日宜命將登壇襲爵受封上官赴任臨政親民○

歷例曰王日者春寅夏巳秋申冬亥

今易為官日

官日者

春卯夏午秋酉冬子

今易為王日

相日者春巳夏申秋亥

冬寅民日者春午夏酉秋子冬卯守日者春酉夏子

秋卯冬午○曹震圭曰王日者四時正王之辰四正之位帝王之象故得其政治也官日者四時臨官之辰諸侯之象相日者四時官日所生也相氣之辰宰相之象民日者四時死絕之辰庶民之象守日者四時胎絕之辰無氣能自固守以待將來各取其義以為名也

天寶 天對 天玉 天岳 天符 執儲

樞要歷曰天寶天對天玉天岳

今疑天岳非吉神

天符執儲皆

月內明星也所直之日各宜修宮室繕城郭納親禮
進人口○歷例曰天寶者正月起辰天岳者正月起
申天符者正月起戌皆順行六陽辰天對者正月起
巳天玉者正月起未執儲者正月起丑皆順行六陰
辰○曹震圭曰此天黃道也蓋天者萬物之主黃者
中央之色道者乃天皇居九重之內出入所履之道
也故名曰天黃道其神逐年月日各有所主易傳云
乾為天為君為父是天皇之正位也主御羣靈司萬

物生死故曰司命亦能掌握萬物故又名曰天符今
皆作天府此乾卦之主也初行其道起於戌是乾之
世爻納甲也其對衝巽宮為明堂是天皇治事之宮
也聖人南面而聽天下故以巽為明堂又名曰執儲
是天皇所操執以除暴虐也故曰齊乎巽初行其道
起於丑是巽之初爻納甲也其明堂之左有青龍宰
相之象是震宮也震為雷為龍故曰青龍又名曰雷
公初行其道起於子是震之初爻納甲也其明堂之

前有朱雀是離宮也又曰飛流故離為火朱雀飛流之象初行其道起於卯是離卦初爻納甲也其明堂之右有白虎將軍之象又曰天樺是天皇之先驅也又曰天馬是天皇之所乘也初行其道起於午是震卦外體之納甲也謂震為大臣之象向外則為將軍也其天皇之右有玉堂是天皇寢安之宮天后之位是坤宮也又曰天玉是天皇寵愛之所初行其道起於未是坤之初爻納甲也天皇之左有金櫃是寶藏

之府庫艮之位也又曰天寶初行其道起於辰是艮卦初爻納甲也天皇右旁有天德兌也是天皇施仁布德喜樂之宮又曰天對是天皇納諫聽政論道經邦之所初行其道起於巳是兌之初爻納甲也天皇左旁有天刑坎也勞卦也是掌刑罰之所又曰蚩尤蚩尤者虐民之神初行其道起於寅坎之初爻納甲也白虎天棒之後有天牢又曰天獄是囚禁之所也配之朱雀明堂之間蓋使刑禁明而無私也初行其

道起於申是坎之外體納甲也故云勞乎坎也天皇
天牢之間有元武又曰陰私是邪妄之臣故論正道
必有讒言舉正直則邪妄亦進易卦爻辭半君子半
小人則天下之道然也初行其道起於酉是離卦外
體納甲也故離為朱雀飛流皆小人之輩也中宮之
位有勾陳是天皇嬪妃之位天帝之所居也初行其
道起於亥是乾宮之陰辰兌宮之外體納甲也蓋兌
者說也是天皇喜悅之宮也故用配焉又曰天岳疑

是天獄岳者山之高地祇也在天必無此雷公本吉
神也非凶神也今故以天岳為天獄凶神以雷公可
為吉神又曰易卦納甲各有逆順今六陰之神亦順
者謂奉上之禮不可以逆其情是天道順動而無逆
也

按曹氏之說合黃黑二道而論之也其次序起例并
見第五卷

青龍 明堂 金櫃 天德 玉堂 司命

神樞經曰青龍明堂金櫃天德玉堂司命皆月內天黃
道之神也所直之日皆宜興衆務不避太歲將軍月
刑一切凶惡自然避之○李鼎祚曰青龍正月起子
金櫃正月起辰司命正月起戌皆順行六陽辰也明
堂正月起丑天德正月起巳玉堂正月起未皆順行
六陰辰也○曹震圭曰明堂即執儲金櫃即天寶天
德即天對玉堂即天玉司命即天府其名雖異其理
一也義見前篇

枝德

經曰枝德者地支帶德也所直之日宜修造築垣○歷
例曰枝德者正月在未順行十二辰義見第二卷歲
枝德節

寶日 義日 制日

經曰寶日者幹生枝也義日者枝生幹也制日者幹克
枝也其日利行軍○歷例曰寶日者丁未丁丑丙戌
甲午庚子壬寅癸卯乙巳戊申己酉辛亥丙辰義日

者甲子丙寅丁卯巳巳辛未壬申癸酉乙亥庚辰辛
丑庚戌戌午制日者乙丑甲戌壬午戊子庚寅辛卯
癸巳乙未丙申丁酉巳亥甲辰是也○曹震圭曰幹
生枝者得其天時也枝生幹者得其地利也幹克枝
者得其人和我可制彼也故幹為天為我枝為地為
彼也

大明

唐李淳風將諸家陰陽書總集一十五日謂之大明其

日宜舉動百事○歷例曰大明者辛未壬申癸酉巳卯壬午甲申壬寅甲辰丙午巳酉庚戌丙辰巳未庚申辛酉是也○曹震圭曰不用亥子丑巳四枝乙丁戌三幹者何也蓋子丑北方之位陰陽始立之辰其道暗故不用也亥巳為陰陽極終之位反於不顯亦不用也乙為草族其體不真丁為灰火其光不照戌為王土其體不動故不用也其餘十四日各有所論如寅午戌火也甲土也土中之火不顯也卯未木也

癸為陰微之火居木中有烟無焰也辰戌王土也壬
為水也若相加則兩無成也寅戌火未盛也丙從水
滅微火也寅午戌火庚金也相加則虧損也辛卯丙
申亦然

七聖日

唐賈耽集黃帝元女文王周公孔子天老董仲舒通用
之日謂之七聖總三十七日其日宜興動百事七聖
者丙寅丁卯戊辰巳巳壬申癸酉甲戌乙亥丙子丁

丑庚辰辛巳甲申乙酉戌子巳丑庚寅辛卯甲午乙未戌戌巳亥壬寅癸卯甲辰乙巳戌申巳酉庚戌壬子癸丑甲寅乙卯戌午巳未庚申辛酉

神在日

唐賈耽總集三十五日為之神在其日宜禱祠祭祀實受其福神在日者甲子乙丑丁卯戌辰辛未壬申癸酉甲戌丁丑巳卯庚辰壬午甲申乙酉丙戌丁亥巳丑辛卯甲午乙未丙申丁酉乙巳丙午丁未戌申巳

酉庚戌乙卯丙辰丁巳戊午己未辛酉癸亥○曹震
圭曰子者陰陽未顯禍福未分故不獲福也惟甲子
乃陰陽始建之辰羣靈皆在故宜用焉寅者陽氣發
泄之辰陰氣消盡之位鬼神者陰氣也消滅則亡故
不在焉亥巳者陰陽極終之辰亦不受福也惟乙巳
丁巳陽光相助丁亥癸亥陰氣暗助此四辰亦可祭
也壬癸者陰氣水也鬼神之屬也四季者墓土也若
相加得壬辰壬戌癸丑癸未此四日是鬼神自受克

制故不獲福也其餘庚午戌戌辛丑癸卯甲辰庚申
此六日未詳其義三厯撮要云舊厯錯悞今依官厯
改正未審舊厯為非新厯為是也

五合日

樞要厯曰五合者月內良日也其日宜結婚姻會親友
立券交易○厯例曰五合者寅卯日也○曹震圭曰
十幹者夫之象十二支者婦之象今自子為始以甲
相配至酉而止不及戌亥然戌能進五辰配寅中之

甲亥能進前五辰配卯中之乙而成夫婦會合之禮
故曰五合若其他則進五無所配也雖有辰配申中
之庚巳配酉中之辛而申酉反為五離者易曰一陰
一陽之謂道雜則相乖合則睽離也故曰五離忌見
本節

除神

按通書以申酉日為除神與五合對衝之日也宜沐浴
祓除災眚

陰陽不將

天寶歷曰陰陽不將者以月建為陽謂之陽建正月起
寅順行十二辰月厭為陰謂之陰建正月起戌逆行
十二辰分於卯酉會於子午厭前枝幹自相配者為
陽將厭後枝幹自相配者為陰將厭後幹配厭前枝
為陰陽俱將厭前幹配厭後枝者為陰陽不將也陽
將傷夫陰將傷婦陰陽俱將夫婦俱傷陰陽不將夫
婦榮昌戊巳之幹位在中央戌為陽將寄於艮巳為

陰將寄於坤經云春冬已不將秋夏戌不將○歷例
曰陰陽不將者正月辛亥辛丑辛卯庚子庚寅己亥
己丑己卯丁亥丁丑丁卯丙子丙寅二月庚子庚寅
庚戌己亥己丑丁亥丁丑丙子丙戌丙寅乙亥乙丑
三月己酉己亥己丑丁酉丁亥丁丑丙戌丙子乙酉
乙亥乙丑甲戌甲子四月丁酉丁亥丙戌丙子
戌戌戌申戌子乙酉乙亥甲申甲戌甲子五月丙申
丙戌戌申戌戌癸未乙酉乙亥甲申甲戌癸未癸酉

癸亥六月乙未乙酉戊戌戊申戊午甲午甲申甲戌
癸未癸酉壬午壬申壬戌七月乙巳乙未乙酉戊午
戊申甲午甲申癸未癸酉癸巳壬申壬午八月甲辰
甲午甲申戊辰戊午戊申癸巳癸未壬辰壬午壬申
辛巳辛未九月戊辰戊午癸卯癸巳癸未壬辰壬午
辛卯辛巳辛未庚辰庚午十月癸卯癸巳巳卯巳巳
壬寅壬辰壬午辛卯辛巳庚寅庚辰庚午十一月壬
寅壬辰巳丑巳卯巳巳辛丑辛卯辛巳庚寅庚辰丁

丑丁卯丁巳十二月巳丑巳卯辛丑辛卯庚子庚寅
丁丑丁卯丙子丙寅丙辰庚辰

按厭前枝幹自相配者為陽將是純陽無陰也厭後
枝幹自相配者為陰將是純陰無陽也厭後幹配厭
前枝者為陰陽俱將是陰非其陰陽非其陽則其道
相乖也蓋幹為陽當居於前枝為陰當從其後是夫
唱婦隨之理故厭前幹配厭後枝為陰陽不將也

周堂

歷曰大月從夫順數小月從婦逆數值第堂廚竈日宜用之如值翁姑日而無翁姑者亦可用○曹震圭曰



乾為父故配翁也坤為母故配姑也坎為宅第居北向南也艮為竈丙火長生之位也巽為廚是萬物潔齊之所也離為夫南方陽位男正位乎外也震為婦大月從夫順數小月從婦逆行是夫尊而婦卑陽順

而陰逆之理也遇翁姑夫婦者凶第堂厨竈者吉或以第為兄弟之弟悞矣

鳴吠日

一行云鳴吠者五姓安葬之辰也用之者得金鷄鳴玉犬吠上下不呼亡靈安穩子孫富昌如用破地則於其日擇克姓者用○鳴吠日者庚午壬申癸酉壬午甲申乙酉庚寅丙申丁酉壬寅丙午巳酉庚申辛酉也○曹震圭曰金鷄者兌也兌宮酉也玉犬者艮也


艮為犬也大抵外宅之要在山澤地勢是坤艮兌也
故以坤兌往來加艮順布八卦視艮所臨之辰為艮
也如兌加艮則艮臨離午也又以離加艮則艮臨兌
酉也又以坤加艮則艮臨坤未申也又以艮自加艮
丑寅也丑未二辰乃墓絕無氣之位故不可用又十
幹之中戌為陽土以配中宮明堂之位不可用也甲
午甲寅丙寅者乃自死自旺自生之日故不用止餘
一十四日為鳴吠吉日也又地理新書括地圖云去

東海有桃都山大桃樹盤曲三千里上有一金鷄下
有二神人一名鬱一名壘各持葦索用捉不祥之鬼
及天將旦日照金鷄鳴天下衆鷄悉從而鳴金鷄鳴
訖下食惡鬼金鷄鳴時百鬼皆走避也

鳴吠對日

一行經云鳴吠對日者是五姓外宅用之破土斬草也
○鳴吠對日者丙寅丁卯丙子辛卯甲午庚子癸卯
壬子甲寅乙卯也

按鳴吠對者乃與鳴吠對衝之日其巳丑日無對衝
庚寅與甲申壬寅與丙申又互為對衝故止餘九日
今取十日者蓋甲午日雖不用為鳴吠然其對衝庚
子可用為鳴吠對也若甲寅之對庚申丙寅之對壬
申則鳴吠日中已用之矣惟甲午疑應作甲子蓋甲
子本與庚午對衝且既用庚子不宜并用甲午也恐
傳者有悞



御定星厯考原卷三

欽定四庫全書

子部

御定星厯考原卷四

詳校官欽天監天文生臣賈德輔

靈臺郎臣倪廷梅覆勘

總校官編修臣王燕緒

校對官主事臣郭長發

謄錄監生臣魏綿曾

欽定四庫全書

御定星歷考原卷四

月事凶神

月建

天寶歷曰月建者陽建之神也所理之方戰鬪攻伐宜背之不可抵向所直之日宜封建視事不宜興造土功結親禮○歷例曰正月建寅順行十二辰○曹震圭曰月建所理之地戰鬪攻伐不宜向而宜背者蓋

使我乘旺氣而攻彼休囚也所直之日宜封建視事者建者健也是月內羣神之長萬神無不咸服也不可興造土功者蓋彼當旺勢不可犯也其不可結親禮者是陽建獨旺陰建氣消之辰親禮之道宜陰陽相和若偏則不宜也

月破

月破者月建所衝之日也與歲破義同

天罡 河魁

桑道茂曰天罡河魁者月內凶神也所直之日百事宜
避○歷例曰陽建之月前三辰為天罡後三辰為河
魁陰建之月反是○曹震圭曰魁罡者乃月建四殺
之辰平收之日也○洞源經云對七為衝隔三為破
選擇家所謂辰破丑而丑衝未亥破寅而寅衝申午
破卯而卯衝酉酉破子而子衝午申破巳而已衝亥
戌破未而未衝丑是也

月殺

廣聖歷曰月殺者月內之殺神也其日忌停賓客興穿掘營種植納羣畜○歷例曰月殺者正月起丑逆行四季

按月殺與歲殺同義見第二卷

月刑

廣聖歷曰月建所刑之辰其日忌出軍攻戰養育生財結婚姻營造屋舍○歷例曰月刑者正月巳二月子三月辰四月申五月午六月丑七月寅八月酉九月

未十月亥十一月卯十二月戌○選擇家書曰寅刑
巳巳刑申申刑寅為無恩之刑未刑丑丑刑戌戌刑
未為恃勢之刑子刑卯卯刑子為無禮之刑辰午酉
亥為自刑○曹震圭曰月刑者月建之三刑也是前
後三辰相尅制也因名曰三刑假如無恩刑者謂巳
火也賴寅木而生反以長生之庚金制寅木也申金
也賴巳火而生反以長生之壬水制巳火也寅木也
賴申中長生之水土而生反以所生火尅申金也以

子反害其母為無恩故曰刑也或曰寅以生火刑巳
中生金巳以寄土刑申中生水申以生水刑寅中生
火也恃勢刑者丑以墓金尅未中墓木未以陰墓之
水尅戌中墓火戌以墓火尅丑中墓金又云丑恃癸
水刑戌之墓火戌恃辛金刑未之墓木未恃丁火刑丑
之墓金也無禮刑者謂卯中之乙賴子為貴子中之
癸賴卯為貴然卯以長生之巳土刑子中之癸水子
以長生之辛金刑卯中之乙木傷其貴德失其尊卑

故曰無禮也自刑者辰之墓土自制其墓水午中生乙自制其己土酉中生丁自制其辛金亥中生木自制其己土故曰自刑也

按月刑與歲刑同而理解各異兩存其說以備互考又褚華谷曰子卯一刑也寅巳申二刑也丑戌未三刑也自卯順至子子逆至卯極十數而為無禮之刑寅逆至巳巳逆至申極十數而為無恩之刑丑順至戌戌順至未極十數而為恃勢之刑故皇數中天以

十為殺數積數至十則悉空其數天道惡盈滿則覆也此三刑之法所由起也此亦可備一說

月害

神樞經曰月害者陽建所害之辰也所直之日忌攻城野戰牧養羣畜結會親姻請醫巫納奴婢○歷例曰正月起已逆行十二辰○曹震圭曰月害者月中六害也假令卯辰相害者卯以乙旺之木害辰墓之土辰以墓土却害卯中癸水也寅巳相害者謂寅以旺

甲害巳中戌土而已以生庚害寅中旺甲也丑午相
害者丑以癸水害午中丁火午以己土害丑中癸水
也子未相害者子以所生之辛金害未中墓木未以
旺土害子中旺水也申亥相害者亥以生水害申中
生土申以旺金害亥中生木又以生土害亥中旺水
也酉戌相害者戌以墓火害酉之旺金酉以所生丁
火害戌中辛金也

按六害者不和也凡事莫不喜合而忌衝正月建寅

與亥合而已衝之故寅與巳害二月建卯與戌合而辰衝之故卯與辰害蓋月建者衆神之首衝其所合是以害也

獨火

按獨火與月害同亦名遊禍又名六害

月虛

樞要歷曰月虛者月內虛神也其日忌開倉庫出財物運動征行成親禮○歷例曰月虛者正月起丑逆行

四季○曹震圭曰月虛者月建三合五行成形之位
物初成形其體未實故名曰虛與月殺同位

大耗

樞要歷曰大耗者月中虛耗之神也其日忌營庫藏出
財物遠經求取債負○歷例曰大耗者正月起申順
行十二辰○曹震圭曰大耗者月建擊衝破散之辰
也與月破同位並見第二卷

小耗

樞要歷曰亦月內之耗神也其日忌經營種蒔納財交易開市○歷例曰小耗者常居月建前五辰○曹震圭曰小耗者小損也乃月建氣絕之辰大耗之從神也並見第二卷

大時

神樞經曰大時者將軍之象也所直之日忌出軍攻戰築室會親○李鼎祚曰大時者正月起卯逆行四仲○淮南子曰大時者咸池也○曹震圭曰大時者乃

月建三合五行沐浴之辰也蓋五行至此則敗絕是最凶之辰也故曰大凶之時

小時

神樞經曰小時者郎將之象也其日忌結親姻開倉庫
○淮南子曰小時者月建也○曹震圭曰小時者是
當時之旺辰也忌結親姻者因陽氣獨持旺氣也忌
開倉庫者是旺氣發而不收也

四廢

廣聖歷曰四廢者四時衰謝之辰也其日忌出軍征伐
造舍迎親封建拜官納財開市○歷例曰春庚申辛
酉夏壬子癸亥秋甲寅乙卯冬丙午丁巳○蓬瀛經
曰四廢者是五行無氣福德不臨之辰百事忌用○
通書云春以庚辛為廢夏以壬癸為廢秋以甲乙為
廢冬以丙丁為廢春庚辛者而申酉亦屬金夏壬癸
者而子亥亦屬水秋甲乙者而寅卯亦屬木冬丙丁
者而已午亦屬火謂之支干連見○曹震圭曰四廢

者干支俱絕也假令庚申辛酉絕於春寅卯辰也他
倣此

四窮

總要歷曰四窮者謂亥為陰絕之辰以四時旺干臨之
故曰四窮所直之日不可遠行征伐出納財物○歷
例曰春乙亥夏丁亥秋辛亥冬癸亥○曹震圭曰亥
者地支末辰極陰之位以四時陰干配之故曰四窮

四耗

總聖歷曰四耗者謂四時休干臨分至之辰也其日忌會親姻出師開倉庫施債負○歷例曰春壬子夏乙卯秋戊午冬辛酉○曹震圭曰物之將分者必散也至者盡也是陰陽數盡而將分也又得休干臨之故曰耗

按四耗日固是休干亦休支也春壬子幹枝皆水夏乙卯幹枝皆木冬辛酉幹枝皆金秋戊午幹土而枝火洞源經云火不尅金何旺土生金火亦生金也蓋

春木旺則水耗夏火旺則木耗秋金旺則火土耗冬水旺則金耗故曰四耗

四擊

四擊者春戌夏丑秋辰冬未

按四擊者四時所衝之墓辰也如正二三月建寅卯辰辰與戌衝故戌為四擊也餘倣此

五虛

樞要歷曰五虛者四時絕辰也其日忌開倉庫營種蒔

出財寶放債負○歷例曰五虛者春巳酉丑夏申子
辰秋亥卯未冬寅午戌也○曹震圭曰五虛者四時
逢絕之辰也物絕則損朽其中虛而無實也故曰虛
如春木旺巳酉丑金絕也夏火旺申子辰水絕也秋
金旺亥卯未木絕也冬水旺寅午戌火絕也

按五虛者三合五行絕胎養之位與歲神三殺起例
同

五墓

廣聖歷曰五墓者四旺之墓辰也其日忌營造起土嫁娶出軍○歷例曰五墓者正二月乙未四五月丙戌七八月辛丑十月十一月壬辰四季月戊辰也○曹震圭曰五墓者五行旺于自臨墓辰也十干者身之象若營造起土似臨於無氣之位也又以干為夫之象若嫁娶則夫自臨死氣之位也又以干為我若出軍征伐是自臨死墓之地也故忌之假如正二月木旺未墓於未加以乙未是自臨墓辰也餘倣此

九坎

廣聖歷曰九坎者月中殺神也其日忌乘船渡水修隄防築垣牆苫蓋屋舍○歷例曰九坎者正月在辰逆行四季五月在卯逆行四仲九月在寅逆行四孟○曹震圭曰坎者陷也險也不平也其忌如此義與次節九焦同

九焦

廣聖歷曰九焦者月中殺神也其日忌爐冶鑄造種植

修築園圃○歷例曰正月在辰逆行四季五月在卯
逆行四仲九月在寅逆行四孟○曹震圭曰九坎九
焦者是月中之殺神逆天地之道者也假令正二三
四為歲首東方之位當用孟辰以生萬物今則以季
辰收殺萬物是其逆也五六七八為歲中今雖用仲
辰成熟萬物然歲首不與其生焉有成熟哉九十一
一十二月為歲之終萬物收藏之時今方欲以孟辰
生育萬物豈能有生育哉是逆天地之道萬物無能

成就也

九空

廣聖歷曰九空者月內殺神也其日忌修造倉庫出入
貨財○歷例曰九空者正月在辰逆行四季○曹震
圭曰九空者墓庫破散之神也庫破則空衝則散假
令寅午戌月火庫在戌辰能衝散也亥卯未月木墓
在未丑能衝散也申子辰月水墓在辰戌能衝散也
己酉丑月金墓在丑未能衝散也今歷家所傳與九

坎九焦同行者非蓋所傳有誤紀歲厯亦止是逆行
四季

大殺

神樞經曰大殺者月中廉察也所直之日忌出軍征討
嫁娶納財豎柱上樑移徙置室○李鼎祚曰大殺者
正月在戌二月在巳三月在午四月在未五月在寅
六月在卯七月在辰八月在亥九月在子十月在丑
十一月在申十二月在酉○曹震圭曰東方之位生

育萬物南方之地成熟萬物西方之位殺伐萬物北方之位收藏萬物大殺者月中廉察也子丑寅月歷西方申酉戌者蓋謂陽氣將出萬物將生故巡察西方無以妄殺也卯辰巳月歷南方巳午未者謂萬物生長之時故巡察南方使有成熟也午未申月歷東方寅卯辰者謂萬物成熟宜在養育也酉戌亥月歷北方亥子丑者謂萬物收成使有斂藏也

劫殺

神樞經曰劫殺者劫害之辰也其日忌臨官視事納禮
成親戰伐行軍出入興販○李鼎祚曰正月起亥逆
行四孟○曹震圭曰劫殺者三合五行之絕神也
按劫殺起於絕並見第二卷

死氣

神樞經曰死氣者無氣之辰也其日忌戰鬪征伐療病
求醫安置產室經營栽植○李鼎祚曰死氣者常居
月建前四辰○曹震圭曰死氣者以月建為臨官前

臨死位也假令二月建卯為臨官帝旺在辰衰在巳病在午死在未也或云生氣之衝辰也謂此愛其生彼愛其死我旺而彼死也故常與生氣對衝

死神

神樞經曰死神者月中凶神也其日忌請醫服藥出師征討種植樹木進人納畜○李鼎祚曰常居月建前三辰○曹震圭曰死神者以月建為旺辰前逢死位也大抵死氣之前必有死神其義同前

遊禍

神樞經曰遊禍者月中惡神也其日忌服藥請醫祀神致祭○李鼎祚曰遊禍者正月起已逆行四孟○曹震圭曰遊禍者三合五行臨官之神是對衝劫殺之位也

按遊禍者以其流行於四隅故曰遊以其過旺故曰禍

天獄

神樞經曰天獄者月中禁神也其日忌獻封章興詞訟
赴任征討○李鼎祚曰天獄者正月在子順行四仲
○曹震圭曰天獄者是三合五行胎位之辰也當正
月起子逆行非順行也恐傳之者有誤

天火

玉帳經曰天火者月中凶神也其日忌苫蓋築壘垣牆
振旅興師會親娶婦○厯例曰天火者正月在子順
行四仲○曹震圭曰天火非天之火是五行旺辰中

藏陽火也假令寅午戌月在子蓋子中藏陽氣之火其勢最弱待寅午戌月火勢興旺以顯其光故子中有霹靂火也是水中之火見之於天也亥卯未月在卯蓋卯中有伏燄之火也火氣既生於寅至卯而木旺反蔽其燄而成炭又待亥卯未月木再生之故卯內有爐中火也申子辰月在午蓋午中有正旺之火其勢最大物莫敢侵其光反闇待申子辰月水勢將興反制其光上下俱明故午中有天上火也已酉丑

月在酉謂酉中有長生丁火如硫黃煤炭之類故待
己酉丑月金石之氣而再發旺也故酉中有山下之
火也且子中之陽火卯中之木火午中之旺火酉中
長生丁火莫非天道自然故以名之

地火

神樞經曰地火者月中凶神也其日忌修築園圃栽植
種蒔○歷例曰地火者正月起戌逆行十二辰○曹
震圭曰地火者陰奪陽也是陰建之權勢也○天文

志曰陰行陽之政物傷而必尅終以自害也竝見月厭節

天狗

樞要歷曰天狗者月中凶神也其日忌禱祀鬼神祈求福願○歷例曰天狗者常居月建前二辰○曹震圭曰天狗者月中禦衛之天也去除私邪之神無使敢侵故居建前二辰是禦於門首也自子建之月起於寅寅者艮之陽辰也易曰艮為犬是也祈福願祠鬼

神皆為正道故竝忌之

土符 土府 地囊

總要歷曰土符土府地囊皆土神也其日忌破土穿井
開渠築牆○歷例曰土符者正月丑二月巳三月酉
四月寅五月午六月戌七月卯八月未九月亥十月
辰十一月申十二月子○土府者與月建同行○地
囊者正月庚子庚午二月癸未癸丑三月甲子甲寅
四月巳卯巳丑五月戊辰戊午六月癸未癸巳七月

丙寅丙申八月丁卯丁巳九月戊辰戊子十月庚戌
庚子十一月辛未辛酉十二月乙未乙酉○曹震圭
曰土符者乃土地握符信之神使掌五土也假令春
木旺土受其尅故托子金以制之是春三月歷己酉
丑也夏火旺土休賴火為母以養之故夏三月歷寅
午戌也秋金旺土相不畏木制故秋三月歷亥卯未
也冬水旺土亦剛堅賴水以柔和之故冬三月歷申
子辰也○土府者是土地之府庭也土為萬物之主

月建為月內萬神之主各隨四時而運蓋月建之體本土也以其居故曰府○地囊者乃土地之庫藏也其義未詳

兵禁

總要歷曰兵禁者用兵凶辰也其日忌出師振旅閱武教戰○歷例曰兵禁者正月起寅逆行六陽辰○曹震圭曰兵家所利者陰道也所忌者陽道也故兵禁正月起寅逆行六陽辰也○又月令曰孟春之月不

可稱兵稱兵必天殃兵戎不起不可從我始故正月
以寅為禁辰也二月子相行四殺也三月戌耗破之
辰也四月申四殺三刑也五月午自刑也六月辰天
罡四殺也七月寅破耗三刑也八月子四殺死神也
九月戌河魁也十月申六害也十一月午破耗也十
二月辰四殺天罡也其忌可知

大敗

總要歷曰大敗者兵敗忌辰也其日忌臨陣侵敵攻城

野戰○歷例曰正月起卯逆行四仲○曹震圭曰大敗者三合五行沐浴休敗之辰也其氣敗絕無以勝彼其忌可知

伐日

遁甲經曰伐日者支尅干辰也其日忌攻討征伐出軍掠地○王璋曰伐日者庚午辛巳丙子戊寅己卯癸未癸丑甲申乙酉丁亥壬辰壬戌也○曹震圭曰伐者彼伐於我也六壬經云干為尊為我支為卑為彼

是卑伐於尊彼尅於我其義逆也故忌之

專日

經曰專日者謂支干五行相同也其日忌出軍○歷例曰專日者甲寅乙卯丁巳丙午庚申辛酉癸亥壬子戊辰戊戌己丑己未共十二日也○曹震圭曰六壬經云幹為我枝為彼今幹枝同類是彼我同德兩勢相敵不分勝負故忌出軍

按專日亦名和日

月厭

天寶曆曰月厭者陰建之辰也所理之方可以禳災祈福避病所直之日忌遠行歸家移徙婚嫁○曆例曰月厭者正月在戌逆行十二辰○曹震圭曰月厭者厭魅之神也其性暗昧私邪不正故各忌之蓋十一月建子陰陽氣爭冬至前陰氣極冬至後陽氣生故自建子之月陽建順歷丑寅卯一十二辰陰建逆歷亥戌酉一十二辰至五月夏至二氣又同建而相爭

也亦名曰陰建

按淮南子曰北斗之神有雌雄十一月起運於子月
徙一辰雄左行雌右行五月合於午謀刑十一月合
於子謀德太陰所居辰為厭日厭日不可以舉百事

厭對

天寶厯曰厭對者月厭所衝之辰也其日忌嫁娶○厯
例曰厭對者正月起辰逆行十二辰

往亡 氣往亡

堪輿經曰往者去也亡者無也其日忌拜官上任遠行
歸家出軍征討嫁娶尋醫○厯例曰往亡者正月在
寅二月在巳三月在申四月在亥五月在卯六月在
午七月在酉八月在子九月在辰十月在未十一月
在戌十二月在丑○又氣往亡者立春後七日驚蟄
後十四日清明後二十一日立夏後八日芒種後十
六日小暑後二十四日立秋後九日白露後十八日
寒露後二十七日立冬後十日大雪後二十日小雪

後三十日皆自交節日數之○曹震圭曰往亡者往而不反之意也孟者初也仲者中也季者末也蓋歲之始中終之義也正二三月乃歲之初皆以四孟辰為之乃五行初生之地是生氣之道往而亡也五六七八月乃歲之中皆以四仲辰為之蓋四仲者五行當旺之辰是旺氣之道往而亡也九十十一十二月乃歲之終皆以四季辰為之謂四季者乃五行終墓之地是萬物皆歸往而亡也又氣往亡者以四立

月往亡之辰三合化象之成數言之也假令正月立春寅為往亡寅午戌合火局火之成數七也四月立夏卯為往亡亥卯未合木局木之成數八也七月立秋酉為往亡巳酉丑合金局金之成數九也十月立冬未為往亡土無化象便以本行土為之其成數十也各倍之為次月往亡日三之為下月往亡日也獨水數不用者蓋四立之月往亡無申子辰日也然一歲之內四季之月以辰為首辰月以申為往亡申合

水局水之成數六也故三月中氣後六日九月中氣
後十二日各得往亡六月則土旺後二六一十二日
十二月土旺後三六一十八日亦得往亡或節氣加
時早晚間有差一日者然其理大槩如此○通書云
唐太宗曰宋武帝以往亡起兵軍吏以為不可帝曰
我往彼亡果克之由此言之可廢明矣

歸忌

廣聖歷曰歸忌者月內凶神也其日忌遠行歸家移徙

娶婦○歷例曰孟月丑仲月寅季月子○曹震圭曰子者一陽丑乃二陽寅乃三陽蓋此三辰陽氣始盛主動於外不可反歸於內也

按孟月忌丑仲月忌寅季月忌子者皆忌退後一辰所謂歸忌也如子為仲丑為季寅為孟故孟月忌退歸於季仲月忌退歸於孟季月忌退歸於仲也

章光

堪輿經曰章光者陰建前辰也其日忌嫁娶○歷例曰

常居陰建前一辰也○曹震圭曰章光者能為月厭彰顯其道故曰章光

無翹

天寶厯曰無翹者翹猶尾也陽烏所主陰則無之常居厭後故曰無翹其日忌嫁娶○曹震圭曰翹猶首翹婦人之飾也無翹者是無其飾也故忌嫁娶

咸池 招搖 八風 觸水龍

樞要厯曰咸池招搖八風觸水龍所直之日忌乘船渡

水涉江河○歷例曰咸池者正月起卯逆行四仲招搖者正月起辰逆行十二辰八風者春丁丑巳酉夏甲申甲辰秋辛未丁未冬申戌甲寅觸水龍者丙子癸丑癸未也○曹震圭曰咸池者三合五行沐浴之辰是陽建之浴地也五行至此皆值沒溺其忌可知招搖者動而不安陰建之衝也故與六儀同行又天文志有招搖之星在梗河亢池之左角亢之次辰宮也故正月起辰八風者是八節八卦之風也各以四

立之建後一辰為四立之風以其三合前辰為次節
風如立夏建巳以辰為立夏風也申為三合前辰為
夏至風是也假令立春建寅以建前丑為正風以丁
配之取溫和之意也以酉為傍風配之以巳取巳土
長生之地也立夏建巳以辰為正風申為傍風皆以
甲配之者立夏之後風勢極微故配甲以生之也立
秋建申以未為正風而不取傍風者謂秋氣好殺而
無養育之性以辛配之取金風之象又以丁配之存

其溫和之氣也立冬建亥以戌為正風寅為傍風皆以甲配之者以風鳴冬其勢極大配之以甲木以生風也共為八節故曰八風觸水龍者觸犯也龍水物也壬癸亥子水也能與水相勝者火土也火在上為丙土居下為四季辰乃龍之正位壬水所居戌亥為乾天之位有龍象焉故惟餘丙子癸未癸丑為觸水龍日也

血忌 血支

樞要經曰血忌血支其日忌針刺出血○歷例曰血忌者正月丑二月未三月寅四月申五月卯六月酉七月辰八月戌九月巳十月亥十一月午十二月子血支者正月在丑順行十二辰○曹震圭曰血支者氣血之支流也故起於旺建之後生氣之前如人生之後自有血脈暢於四肢若其日針刺者是去其血也故忌之血忌者以人之血脈出入往來一噓一吸運動不息故一歷本位一居其衝亦陰陽各相配之義

也故建陽之月則歷於丑寅卯辰巳午陽氣之位建陰之月則歷於未申酉戌亥子陰氣之位與續世義同正月與血支同起於丑者正月陰陽交泰血氣通和然後流布於四肢也

官符

總要歷曰官符者其日忌拜官視事上表章陳詞訟○歷例曰官符者正月起午順行十二辰○曹震圭曰官符者是歲月中掌符信之官文權之職也常居三

合前辰大抵歲辰月建以其三合前辰為文官後辰為武職是左文右武之義假令正月建寅則午上有官符文權也戌上有白虎武職也併見第二卷

天吏

樞要歷曰天吏者月中凶神也其日忌臨官赴任遠行詞訟○歷例曰天吏者正月起酉逆行四仲○曹震圭曰天吏者三合五行死氣之位五行至此死而無氣乃天之凶吏全無生意也其忌可知

臨日

樞要歷曰臨日者上臨下之義也其日忌臨民訴訟○
歷例曰臨日者正月午二月亥三月申四月丑五月
戌六月卯七月子八月巳九月寅十月未十一月辰
十二月酉○曹震圭曰臨者上臨於下也是陽建之
使臣奉上命以授百官者也建陽之月在三合前辰
是臨於文官官符也建陰之月在三合後辰是臨於
武職白虎也

天賊

神樞經曰天賊者月中盜神也其日忌遠行○李鼎祚曰天賊者正月在丑逆行十二辰○曹震圭曰天賊者盜神也常居天倉後辰蓋倉庫之後必有盜也

致死

樞要歷曰致死者月中凶神也其日忌求醫藥○歷例曰致死者正月起酉逆行四仲○曹震圭曰致死者月建三合五行死敗之辰也與天吏同

牢日 獄日 徒隸 死別 伏罪 不舉

罪刑

壇經曰牢日獄日徒隸死別伏罪不舉罪刑其日皆不宜臨官視事登壇受職○歷例曰牢日者春辰夏未秋戌冬丑也獄日者春未夏戌秋丑冬辰也徒隸者春申夏亥秋寅冬巳也死別者春戌夏丑秋辰冬未也伏罪者春亥夏寅秋巳冬申也不舉者春子夏卯秋午冬酉也罪刑者春丑夏辰秋未冬戌也○曹震

主曰牢日者四時衰謝之辰也衰在墓地故曰牢獄
日者四時墓辰也入於墓故曰獄徒隸者是四時五
行絕辰也置之於卑賤也死別者以其將死而又歸
於墓是四時五行死辰之墓也如春屬木死於午午
為火戌為火墓是也伏罪者是子見其母也蓋為子
有罪父母責之故云伏罪也不舉者是四時五行沐
浴之辰似初沐浴而未冠帶之象不可舉薦於上人
也罪刑者四時五行相刑之墓辰也如春金尅木金

墓在丑也餘倣此

蚩尤 飛流 天棒 陰私 土勃 雷公

樞要經曰蚩尤飛流天棒陰私土勃雷公月內黑道也
其日忌開掘取土立柱上樑嫁娶出行臨官視事○

歷例曰蚩尤者正月起寅天棒者正月起午雷公者
正月起子皆順行六陽辰飛流者正月起卯陰私者
正月起酉土勃者正月起亥皆順行六陰辰并解見
月事吉神篇

天刑 朱雀 白虎 天牢 元武 勾陳

神樞經曰天刑朱雀白虎天牢元武勾陳者月中黑道也所理之方所直之日皆不可興土功營屋舍移徙遠行嫁娶出軍○李鼎祚曰天刑者正月起寅白虎者正月起午天牢者正月起申皆順行六陽辰朱雀者正月起卯元武者正月起酉勾陳者正月起亥皆順行六陰辰并解見月事吉神篇

八龍 七鳥 九虎 六蛇

總要歷曰八龍七鳥九虎六蛇其日皆不可迎婚嫁娶
○歷例曰春甲子乙亥為八龍夏丙子丁亥為七鳥
秋庚子辛亥為九虎冬壬子癸亥為六蛇○曹震圭
曰亥者陰氣之極子者陽氣初生是陰陽氣絕脫謝
之辰也十干象夫十二支象婦今以四時旺干而配
亥子是夫旺而婦絕且我臨於絕地也故忌用之
按甲乙者東方木也為青龍其成數八丙丁者南方
火也為朱雀其成數七庚辛者西方金也為白虎其

成數九壬癸者北方水也為龜蛇其成數六故各因以為名也

九醜

金櫃經曰乙者雷電始發之日戊己者北辰位下之日辛者萬物決斷之日壬者三光不照之日子午卯酉四仲之辰日月之門陰陽之界五千臨此四辰其日不可出軍嫁娶移徙築室○曹植曰九醜者乙卯己卯辛卯乙酉己酉辛酉戊午戊子壬午壬子○曹震

圭曰卯酉為日月出入之門子午為陰陽交爭之界
乙為六合辛為太陽壬為元武己為六賊戊為勾陳
故此五千加此四辰名曰醜又以五千四辰其共數
九故以名之

八專

曾門經曰八專日忌出軍嫁娶○曹植曰八專者丁未
己未庚申甲寅癸丑也

按六壬日辰課體訣曰甲寄居寅乙寄辰還將丙戊

巳宮尋未支丁巳藏功用申地庚金作主盟辛在戌
宮癸寄丑壬干原寄在登明二盤四正無差錯運式
通靈動鬼神蓋即十干祿辰除子午卯酉四正不用
故移於辰戌丑未而各取其干支所配之日是為八
專今六壬三傳起例用之如甲祿在寅卯不用故乙
在辰辰中亦有乙未也丙戌祿在巳午不用故丁巳
在未也庚祿在申酉不用故辛在戌壬祿在亥子不
用故癸在丑相配止有五日以其干支比和故為專

金匱要略卷四
同專日取義以十二支除四正不用餘八故為八專也

五離

樞要歷曰五離者月中離神也其日忌結婚姻會親友作交關立契券○歷例曰五離者申酉日是也○曹震圭曰五離者是陰陽重會之辰也再合則離義見月吉神五合節

重日

天寶歷曰重日者以陰陽混合於亥陽起於甲子而順陰起於甲戌而逆至巳亥而同故曰重日其日忌為凶事利為吉事○歷例曰重日者巳亥二日也○曹震圭曰亥為陰極之位坤辟在焉巳為陽極之位乾辟在焉是陽中陽而陰中陰也故曰重其日忌為凶事者恐重犯也利為吉事者宜再見也

復日

天寶歷曰復日者為魁罡所繫之辰也其日忌為凶事

利為吉事。○歷例曰復日者正七月甲庚二八月乙
辛四十月丙壬五十一月丁癸三九六十二月戊己
日也。○曹震圭曰復者重見也為本建之辰與所遇
之干同也假令正月寅即甲也而又見甲是復也又
如辰戌即戌也丑未即巳也而又見戌巳是復也餘
倣此又地理新書云正月甲七月庚二月乙八月辛
四月丙十月壬五月丁十一月癸三月九月戌六月
十二月己

四離

玉門經曰離者陰陽分至前一辰也謂建卯之月陽氣出陰氣入建子之月陰氣降陽氣升建酉之月陰氣出陽氣入建午之月陽氣降陰氣升故先一日為四離辰也○李鼎祚曰此日忌出行征伐○曹震圭曰四離者冬至前一日水離夏至前一日火離春分前一日陽體分而木亦離也秋分前一日陰體分而金亦離也故名曰四離

四絕

玉門經曰四絕者四立前一辰也○李鼎祚曰此日忌
出軍遠行○曹震圭曰立春木旺水絕立夏火旺木
絕立秋金旺土絕立冬水旺金絕故先一日為絕也

長短星

歷例曰長星者正月初七二月初四三月初一四月初
九五月十五六月初十七月初八八月初二初五九
月初三初四十月初一十一月十二十二月初九是

也○短星者正月二十一二月十九三月十六四月二十五五月二十五六月二十七月二十二八月十八十九九月十六十七十月十四十一月二十二十二月二十五日是也其日忌開市納財立券交易裁衣○曹震圭曰長者過也短者不及也凡開市納財立券交易裁衣皆貴乎中平適宜若或過或不及其忌可知蓋長短星者金火也謂金火之氣能毀傷萬物也

按長星者庚辛也春夏用庚秋冬用辛陽取陽陰取陰也以月建內所寄之干四季則用四時陰干依五虎元遁得庚辛者自建辰向前數之春夏至庚則止秋冬至辛則止其本節所當之卦則取其宮數如春月則以卯為震三四月則以巳為巽四其餘辰則一辰當一得數是也假如正月建寅寅中有甲以甲遁得庚午自寅一震三辰一巳一午一共得七數故七日為長星也二月建卯卯中有乙以乙遁得庚辰自

卯之震三併辰一共四數故四日為長星也三月建
辰辰中無所寄就乙仍遁得庚辰止得一數故一日
為長星也四月建巳巳中有丁以丁遁得庚戌自巳
之巽四歷午未申酉戌共九數也午不用離九者以
巳用巽四故也五月建午午中有丙以丙遁得庚寅
為丙火長生之位故向前得庚子自離九歷未申酉
戌亥子得一十五也六月建未就丁遁得庚戌自未
申歷酉之兌七至戌共得一十也用兌七者以六月

為金氣伏藏之時故用西方之卦也七月建申申中有庚為同體又以秋冬用辛故不用遁辰而用旺辰之酉自申至酉之兌七共得八數也八月建酉酉中有辛故即得兌七也今為二日五日合之亦得七九月建戌就辛遁得庚子辛丑自戌至子得三自戌至丑得四也不用宮數者以戌尚西方之令未至於乾也十月建亥亥中有癸遁得辛酉謂干支同體故用壬遁得辛亥故止得一也十一月建子子中有壬遁

得辛亥故自子之坎一至亥得十二也十二月建丑
就癸遁得辛酉自丑至酉得九也不用宮數與九月
同○短星者丙丁也春夏用丙秋冬用丁陽取陽陰
取陰也各以月建內所寄之干四季則用四時陰干
依五子遁得丙丁者自建辰向前數之春夏至丙則
止秋冬至丁則止其本節所當之卦則取其宮數其
餘辰則一辰當一得數于朔實二十九日內減之餘
數是也假如正月甲遁得丙寅寅為艮八以減二十

九餘二十一故二十一日為短星也二月乙遁得丙戌自卯之震三至戌得一十以減二十九餘一十九也三月就乙遁得丙子自辰一歷巽四至子得一十三以減二十九餘一十六也四月丁遁得丙午為干支同體故即用旺辰之巽四以減二十九餘二十五也五月丙遁得丙申自午至申之坤二共四以減二十九餘二十五也六月就丁遁得丙午為干支同體故即用旺辰得午之離九以減二十九餘二十也七

月庚遁得丁丑自申之坤二歷酉戌亥子丑得七以減二十九餘二十二也八月辛遁得丙申丁酉自免七至申得一十八至酉得一十九也不以減二十九者以其在一十六以上也九月就辛遁得丙申丁酉故自戌至申得一十一至酉得一十二不用宮數與長星同以減二十九餘八十七也今為十六日十七日者未知孰是十月建亥用癸遁得丁巳自亥之乾六至巳得十二以減二十九餘一十七也今為十

四日者未知孰是大抵長星應在十五以前短星應在十六以後恐傳者誤也十一月壬遁得丙午以子丑之月水旺火寒又為丙胎養之位故復用也自子之坎一至午得七以減二十九餘二十二也十二月就癸遁得丙辰自丑至辰得四以減二十九餘二十五也不用宮數與長星同○又按長星用五虎遁短星用五子遁者長星金也陰也短星火也陽也陰金胎於寅陽火胎於子也酉月金旺戌月火墓又為西方之

位既取能傷萬物之義則其各二日也宜矣


反支

歷例曰反支以月朔得戌亥日者初一日得申酉日者初二日得午未日者初三日得辰巳日者初四日得寅卯日者初五日得子丑日者初六日為反支也其日忌上表章

按十二支皆以順布今自戌亥而逆之是反支也其忌可知

上朔

堪輿經曰上朔日忌宴會嫁娶遠行上官○厯例曰陽年以年干加寅順數至亥陰年以年干加丑順數至巳也○曹震圭曰丑寅者艮卦之方也萬物始終之所也已者陽極之辰亥者陰極之辰故陽有生發萬物之功者寅也陰有成終萬物之道者丑也以陽而求會於極陰以陰而往會於極陽則非其相會之道也其忌可知



御定星厯考原卷四